



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿՐԹՈՒԹՅԱՆ, ԳԻՏՈՒԹՅԱՆ, ՄՇԱԿՈՒՅԹԻ
ԵՎ ՍՊՈՐՏԻ ՆԱԽԱՐԱՐ
ՀՐԱՄԱՆ

No 153-Ա/2

31 հունվարի 2023 թ.

ԳԻՏԱԿԱՆ ԵՎ ԳԻՏԱՏԵԽՆԻԿԱԿԱՆ ԳՈՐԾՈՒՆԵՈՒԹՅԱՆ ՊԱՅՄԱՆԱԳՐԱՅԻՆ
(ԹԵՄԱՏԻԿ) ՖԻՆԱՆՍԱՎՈՐՄԱՆ ՇՐՋԱՆԱԿՆԵՐՈՒՄ «ՀԵՌԱՎԱՐ
ԼԱԲՈՐԱՏՈՐԻԱՆԵՐԻ ՀԻՄՆԱԴՐՄԱՆ ԾՐԱԳԻՐ 2023» ՄՐՅՈՒՅԹԸ
ԿԱԶՄԱԿԵՐՊԵԼՈՒ, ՀԱՅՏԱՐԱՐՈՒԹՅԱՆ ՏԵՔՍՏԸ
ԵՎ ՀՐԱՎԵՐԻ ՓԱԹԵԹԸ ՀԱՍՏԱՏԵԼՈՒ ՄԱՍԻՆ

Առաջնորդվելով Հայաստանի Հանրապետության կառավարության 2001 թվականի նոյեմբերի 17-ի N 1122 որոշմամբ հաստատված «Գիտական և գիտատեխնիկական գործունեության պայմանագրային (թեմատիկ) ֆինանսավորման կարգի» 3-րդ կետով, ինչպես նաև հիմք ընդունելով Հայաստանի Հանրապետության վարչապետի 2019 թվականի հունիսի 1-ի N 661-Լ որոշմամբ հաստատված Հայաստանի Հանրապետության կրթության, գիտության, մշակույթի և սպորտի նախարարության կանոնադրության 19-րդ կետի 20-րդ ենթակետը՝

Հ Ր Ա Մ Ա Յ ՈՒ Մ Ե Մ

1. Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում կազմակերպել «Հեռավար լաբորատորիաների հիմնադրման ծրագիր 2023» մրցույթը:
2. Հաստատել մրցույթի հայտարարության տեքստը՝ համաձայն հավելված N 1-ի և հրավերի փաթեթը՝ համաձայն հավելված N 2-ի:
3. Սույն հրամանի կատարման հսկողությունը հանձնարարել ՀՀ կրթության, գիտության, մշակույթի և սպորտի նախարարության գիտության կոմիտեի նախագահ Սարգիս Հայոցյանին:

ՆԱԽԱՐԱՐ՝

ԺԱՆՆԱ ԱՆԴՐԵԱՍՅԱՆ

Հ Ա Յ Տ Ա Ր Ա Ր ՈՒԹ Յ ՈՒ Ն

Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեն կազմակերպում է գիտական և գիտատեխնիկական գործունեության պայմանագրային (թեմատիկ) ֆինանսավորման նպատակով գիտական թեմաների հայտերի ընտրության «Հեռավար լաբորատորիաների հիմնադրման ծրագիր 2023» **ՄՐՑՈՒՅԹԸ**:

Մրցույթին մասնակցելու հայտ ներկայացվում է առցանց (online) ռեժիմով՝ <https://rl-armenia-2023.scs.am> համակարգի միջոցով, մինչև 2023 թվականի ապրիլի 07-ը ներառյալ (**Հայտի** ուղարկման հնարավորությունն արգելափակվում է Երևանի ժամանակով ժամը 18:00-ին):

Մրցույթի հրավերի փաթեթը գետեղված է Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեի պաշտոնական կայքում՝ www.scs.am:

Մրցույթի վերաբերյալ լրացուցիչ տեղեկություններ և խորհրդատվություն կարելի է ստանալ Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեի գիտական գործունեության կազմակերպման վարչությունից՝ զանգահարելով (010) 210140 (ներքին 108) կամ ուղարկելով նամակ էլեկտրոնային փոստով՝ scexpert@scs.am:

Հայաստանի Հանրապետության կրթության, գիտության,
մշակույթի և սպորտի նախարարություն

ՀՐԱՎԵՐ

ԳԻՏԱԿԱՆ ԵՎ ԳԻՏԱՏԵԽՆԻԿԱԿԱՆ ԳՈՐԾՈՒՆԵՈՒԹՅԱՆ ՊԱՅՄԱՆԱԳՐԱՅԻՆ (ԹԵՄԱՏԻԿ) ՖԻՆԱՆՍԱՎՈՐՄԱՆ ՇՐՋԱՆԱԿՈՒՄ «ՀԵՌԱՎԱՐ ԼԱԲՈՐԱՏՈՐԻԱՆԵՐԻ ՀԻՄՆԱԴՐՄԱՆ ԾՐԱԳԻՐ 2023» ՄՐՑՈՒՅԹԻ

I. ԸՆԴՀԱՆՈՒՐ ԴՐՈՒՅԹՆԵՐ

1. Մրցույթը

- 1.1. Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում «Հեռավար լաբորատորիաների հիմնադրման ծրագիր 2023» հայտերի (այսուհետ՝ **Հայտ**) ընտրության մրցույթն (այսուհետ՝ **Մրցույթ**) անցկացվում է համաձայն Հայաստանի Հանրապետության կրթության, գիտության, մշակույթի և սպորտի նախարարի 2023 թվականի հունվարի 31-ի N 153-Ա/2 հրամանի:
- 1.2. **Մրցույթը** կազմակերպում է Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեն (այսուհետ՝ **Կոմիտե**)՝ առաջնորդվելով ՀՀ կառավարության 2001 թվականի նոյեմբերի 17-ի N 1122 որոշմամբ հաստատված գիտական և գիտատեխնիկական գործունեության պայմանագրային (թեմատիկ) ֆինանսավորման կարգով:
- 1.3. **Մրցույթն** ուղղված է արտերկրի գիտնականների ղեկավարությամբ Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող կազմակերպությունում (այսուհետ՝ **Կազմակերպություն**) հեռանկարային, ժամանակակից գիտական ուղղություններով նոր ստորաբաժանումներ ստեղծելուն:
- 1.4. **Մրցույթն** իրականացվում է գիտական և գիտատեխնիկական գործունեության բոլոր բնագավառներով (Հավելված N 2.1):
- 1.5. Ներկայացվող գիտական նախագիծը (այսուհետ՝ **Նախագիծ** (Հավելված N 2.4)) պետք է լինի հավակնոտ, խոստումնալից և իրագործելի:

- 1.6. **Մրցույթի** հրավերի փաթեթը սահմանում է դրան դիմելու կարգը, չափանիշները, **Հայտերի** գնահատման փուլերը և **Նախագծերի** ֆինանսավորումն ու հաշվետվողականությունը:

2. Նպատակը

- 2.1. **Մրցույթի** նպատակներն են.

- խթանել ներպետական և միջազգային համագործակցությունը,
- ներգրավել երիտասարդ հետազոտողների և ասպիրանտների,
- նպաստել երիտասարդ հետազոտողների ինտեգրմանը միջազգային հետազոտական միջավայրին,
- ներգրավել Սփյուռքի գիտական ներուժը,
- բարձրացնել **Կազմակերպության** ներուժը,
- բարելավել գիտական միջավայրը,
- ստեղծել նոր, մրցունակ և հեռանկարային գիտական ստորաբաժանումներ:

3. Խումբը

- 3.1. **Նախագիծը** մշակում և իրականացնում է գիտահետազոտական խումբը (այսուհետ՝ **խումբ**), որը կազմված է առավելագույնը երկու ղեկավար(ներ) արտերկրից (այսուհետ՝ **Խմբի ղեկավար**) և 2-5 անդամից՝ համաղեկավար և կատարողներ:
- 3.2. Խմբի համաղեկավարը և կատարողները **Նախագծի** իրականացման ընթացքում պետք է հանդիսանան Հայաստանի Հանրապետության քաղաքացիներ կամ ռեզիդենտներ, ինչպես նաև բնակվեն Հայաստանի Հանրապետությունում:
- 3.3. **Խմբի** անունից հանդես է գալիս միայն համաղեկավարը՝ **Խմբի ղեկավարի** համաձայնությամբ:

4. Խմբի ղեկավարը

- 4.1. **Խմբի ղեկավար** կարող է լինել այն անձը, ով՝

- ունի գիտական աստիճան,
- հիմնական/պայմանագրային հիմունքով աշխատում և զբաղվում է հետազոտական գործունեությամբ (պրոֆեսոր, դասախոս, հետազոտող, կամ դրան համարժեք պաշտոն զբաղեցնող) արտերկրի որևէ հետազոտական հաստատությունում (բուհ, գիտական կենտրոն):

- սույն **Մրցույթի** հրավերի հրապարակմանը նախորդող 4 տարիների ընթացքում գումարային 12 ամիս և ավելի չի ուսումնառել կամ աշխատել Հայաստանի Հանրապետությունում:

4.2. **Խմբի ղեկավարը** վերջին 5 տարիների համար պետք է ներկայացնի՝

Հավելված 2.1-ով ներկայացված գիտական և գիտատեխնիկական գործունեության «1-5» բնագավառների մասնագիտություններով.

- 4 գիտական հրապարակում միջազգային գիտատեղեկատվական շտեմարաններում («Science Citation Index Expanded (SCIE)», «Social Sciences Citation Index (SSCI)», «Emerging Sources Citation Index (ESCI)», «Arts&Humanities Citation Index (AHCI)»), **կամ** գրքերի հղման ինդեքսի (Book Citation Index) հրատարակիչների ցանկում ներառված հրատարակչությունների հրապարակած գրքի գլուխ կամ հոդված ժողովածուում, **կամ** «Scimago Journal & Country Ranking» պորտալի առնվազն Q4 քառորդ, իսկ գիտաժողովի նյութերի դեպքում՝ առնվազն Q2 քառորդին համարժեք SJR ինդեքս (SCImago Journal Rank Indicator) ունեցող պարբերականներում (այսուհետ՝ **ՄԳՇ**),
- **կամ** 1՝ առնվազն 5 տպագրական մամուլ ծավալ ունեցող մենագրություն, կոլեկտիվ մենագրություն կամ գիտական աշխատություն՝ հրատարակված Web of Science գիտատեղեկատվական հարթակի գրքերի հղման ինդեքսի (Book Citation Index) հրատարակիչների ցանկում ներառված հրատարակչություններում (այսուհետ՝ **Մենագրություն**):

Հավելված 2.1-ով ներկայացված գիտական և գիտատեխնիկական գործունեության «6» բնագավառի մասնագիտություններով՝

- 2 հրապարակում **ՄԳՇ**-ում,
- կամ 1 **Մենագրություն**,

Մեկ Մենագրությունը համարժեք է 4 հրապարակման ՄԳՇ-ում:

4.3. Բեալի ցանկերում (Beall's list, <https://beallslist.net/>) ներառված կեղծ կամ «գիշատիչ» հրատարակչություններում կամ պարբերականներում հրատարակված աշխատություն ներկայացնելու դեպքում **Հայտը** փորձաքննության ենթարկելու հարցը կքննարկվի Հայտերի գնահատման նպատակով ստեղծված մասնագիտական փորձագիտական խորհրդում (այսուհետ՝ **Խորհուրդ**):

4.4. **Խմբի ղեկավարը** պետք է **Նախագծի** իրականացման ընթացքում յուրաքանչյուր տարի հանրագումարային առնվազն 4 շաբաթ անցկացնի Հայաստանի Հանրապետության ընդունող **Կազմակերպությունում**, ինչպես նաև **Նախագծի**

կատարման ընթացքում հանրագումարային առնվազն 60 օր ժամկետով իր ներկայացրած գիտական կազմակերպությունում ընդունի **Խմբի** անդամներին:

4.5. **Խմբի ղեկավարը** պատասխանատու է **Խմբի** ձևավորման համար և հանդես է գալիս **Խմբի** անունից:

5. Խմբի անդամները

5.1. **Խումբը** պետք է ունենա Հայաստանի Հանրապետության քաղաքացի կամ ռեզիդենտ հանդիսացող **համաղեկավար**՝ ծնված 1983 թվականի հունվարի 1-ից հետո:

5.2. **Խմբի** կատարողները կարող են լինել ինչպես Հայաստանի Հանրապետությունից, այնպես էլ արտերկրից:

5.3. **Խմբում** պետք է ընդգրկվի՝

- առնվազն 3 անդամ (ներառյալ **Խմբի** համաղեկավարը)՝ Հավելված 2.1-ով ներկայացված գիտական և գիտատեխնիկական գործունեության «1-4» բնագավառների համար,
- առնվազն 2 անդամ (ներառյալ **Խմբի** համաղեկավարը)՝ Հավելված 2.1-ով ներկայացված գիտական և գիտատեխնիկական գործունեության «5-6» բնագավառների համար:

5.4. **Խմբի** անդամներից (ներառյալ **Խմբի** համաղեկավարը) առնվազն երկուսը պետք է ծնված լինեն 1988 թվականի հունվարի 1-ից հետո և կարող են լինել առնվազն բակալավրիատի երրորդ կուրսի ուսանողներ: Նշված տարիքը կարող է բարձրանալ.

- ՀՀ զինված ուժերում ծառայած լինելու դեպքում՝ 2 տարով,
- երեխայի խնամքի արձակուրդում գտնվելու դեպքում՝ յուրաքանչյուր երեխայի համար՝ 1 տարով:

5.5. Հավելված 2.1-ով ներկայացված գիտական և գիտատեխնիկական գործունեության «1-4» բնագավառների համար կատարողները կարող են լինել **Նախագծի** գիտական և գիտատեխնիկական բնագավառին առնչվող մասնագիտությամբ բակալավրիատի առնվազն առաջին կուրսի ուսանողներ, եթե դպրոցական առարկայական օլիմպիադայի հանրապետական փուլում 11-րդ կամ 12-րդ դասարաններում արժանացել են առնվազն երրորդ կարգի դիպլոմի:

5.6. **Խմբի** երիտասարդ կատարողներից առնվազն մեկը չպետք է ներառված լինի Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորման որևէ ծրագրում:

- 5.7. **Խմբի** անդամները (ներառյալ **Խմբի** համաղեկավարը) չեն կարող ընդգրկվել սույն **Մրցույթին** ներկայացված մեկից ավելի **Հայտերում**, ինչպես նաև չեն կարող հանդիսանալ «Առաջատար հետազոտությունների աջակցության», «Գիտական խմբերի մեկնարկի կամ լաբորատորիաների (բաժինների) ամրապնդմանն աջակցության» «Գիտական խմբերի մեկնարկի» և «Գիտական խմբերի կամ լաբորատորիաների ամրապնդման», «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2022», «Հեռավար լաբորատորիաների հիմնադրման ծրագիր 2022» և «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2023» մրցույթների հաղթողներ:
- 5.8. **Խմբի** ղեկավարները չեն կարող ընդգրկվել սույն **Մրցույթին** ներկայացված մեկից ավելի **Հայտերում**, ինչպես նաև հանդիսանա «Հեռավար լաբորատորիաների հիմնադրման ծրագիր 2022» մրցույթի շահառու:

6. Կազմակերպությանը ներկայացվող պահանջները

- 6.1. **Կազմակերպությունը** պետք է լինի Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող:
- 6.2. **Կազմակերպությունը** պետք է աջակցի **Նախագծի** իրականացմանը:
- 6.3. **Կազմակերպությունը Խմբի ղեկավարին** է տրամադրում **Կազմակերպության** (բուհի ֆակուլտետի) գիտական խորհրդի եզրակացությունը (Board Conclusion), որտեղ նշվում է **Նախագծի** համապատասխանությունը, կարևորությունը և արդիականությունը **Կազմակերպության** գիտական ուղղություններին:
- 6.4. **Կազմակերպությունը, Նախագծի** կատարման առնվազն ողջ ընթացքի համար, Խմբի համաղեկավարին ներառում է գիտական և գիտատեխնիկական գործունեության բազային ֆինանսավորմամբ ծրագրում (եթե ներառված չէ):
- 6.5. **Կազմակերպության** ղեկավարը **Խմբի ղեկավարին** է տրամադրում գրություն, որ ծանոթ է **Մրցույթի** հրավերի պայմաններին և պատրաստ է **Կազմակերպության** ֆինանսական ռեսուրսներով ապահովել հրավերի «6.10.» ենթակետում նշված ստորաբաժանման ձևավորումը:
- 6.6. **Կազմակերպությունը** հասանելիություն է ապահովում առկա ենթակառուցվածքներին և սարքավորումներին:

- 6.7. Ֆինանսական նախահաշվի (այսուհետ՝ **Նախահաշիվ**), «Այլ ծախսեր» հոդվածի «Վերադիր ծախսեր» ենթահոդվածով նախատեսված ֆինանսական միջոցներով **Կազմակերպության** ղեկավարն ապահովում է **Նախագծի** կատարման համար անհրաժեշտ պայմաններ ստեղծելուն ուղղված ծախսերը:
- 6.8. **Կազմակերպության, Կոմիտեի** և ֆինանսավորման երաշխավորված համադրելավարի միջև ՀՀ «Քաղաքացիական օրենսգրքով» սահմանված կարգով կնքվում է «Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում «Հեռավար լաբորատորիաների հիմնադրման ծրագիր 2023» **Մրցույթի** համար պետության կողմից դրամաշնորհի ձևով տրամադրվող ֆինանսական աջակցության գումարների օգտագործման մասին» եռակողմ պայմանագիր (այսուհետ՝ **Պայմանագիր**):
- 6.9. **Նախագծի** իրականացման համար ձեռքբերված սարքերը, նյութերը և ծառայությունները ներառվում են **Կազմակերպության** հաշվեկշռում՝ հետագայում կանոնադրական նպատակներով օգտագործելու համար:
- 6.10. **Նախագծի** իրականացման ընթացքում՝ մինչև 24 ամիսը լրանալը, համադրելավարի (ստորաբաժանման ղեկավար) և կատարողների (ստորաբաժանման աշխատակիցներ) ընդգրկմամբ **Կազմակերպությունում** գիտական և գիտատեխնիկական գործունեության բազային ֆինանսավորմամբ ձևավորվում է նոր գիտական ստորաբաժանում (խումբ, լաբորատորիա, բաժին):

7. Ժամկետները

- 7.1. **Նախագծի** իրականացման տևողությունը 60 ամիս է:
- 7.2. **Մրցույթին** դիմելու վերջնաժամկետն է 2023 թվականի ապրիլի 07-ը: (**Հայտերի** ուղարկման հնարավորությունը կարգելափակվի Երևանի ժամանակով ժամը 18:00-ին):
- 7.3. **Պայմանագրերը** կնքվում են **Մրցույթի** արդյունքները հայտնի դառնալուց հետո՝ 10-օրյա ժամկետում:
- 7.4. **Նախագիծը** սկսվում և իրականացվում է **Պայմանագրում** նշված ժամկետներում:

8. Ակնկալվող արդյունքները

- 8.1. **Նախագծի** կատարման 35 ամիսը լրանալուց հետո **Խմբի** անդամները պետք է ունենան **Մրցույթի** հրավերի «8.5.» ենթակետով սահմանված նշումով.

- Հավելված 2.1-ով ներկայացված գիտական և գիտատեխնիկական գործունեության «1-5» բնագավառների մասնագիտություններով՝
 - առնվազն 3 գիտական հրապարակում **ՄԳՇ**-ում:
 - կամ 1 **Մենագրություն**:
- Հավելված 2.1-ով ներկայացված գիտական և գիտատեխնիկական գործունեության «6» բնագավառի մասնագիտություններով՝
 - առնվազն 2 գիտական հրապարակում ՄԳՇ-ում,
 - կամ 1 Մենագրություն:

8.2. **Նախագծի** ավարտից հետո՝ 60 ամսվա կտրվածքով, **Խմբի** անդամները պետք է ունենան **Մրցույթի** հրավերի «8.5.» ենթակետով սահմանված նշումով՝

- Հավելված 2.1-ով ներկայացված գիտական և գիտատեխնիկական գործունեության «1-5» բնագավառների մասնագիտություններով՝
 - առնվազն 8 գիտական հրապարակում **ՄԳՇ**-ում, որոնցից առնվազն երկուսը՝ Q1 և առնվազն երկուսը՝ Q2 քառորդներում ընդգրկված պարբերականներում,
 - կամ 2 **Մենագրություն**:
- Հավելված 2.1-ով ներկայացված գիտական և գիտատեխնիկական գործունեության «6» բնագավառի մասնագիտություններով՝
 - առնվազն 6 գիտական հրապարակումներ ՄԳՇ-ում, որոնցից առնվազն երկուսը՝ Q1 և առնվազն երկուսը՝ Q2 քառորդներում ընդգրկված պարբերականներում,
 - կամ 2 **Մենագրություն**:

Մեկ Մենագրությունը համարժեք է ՄԳՇ-ում ընդգրկված 4 հրապարակման:

8.3. Որպես **Նախագծի** արդյունք ներկայացված գիտական հրապարակումներից առնվազն կեսում համադեկավարը պետք է լինի կամ առաջին, կամ վերջին, կամ նամակագրություն վարող (corresponding author) հեղինակ, կամ ունենա որևէ համարժեք նշում:

8.4. Որպես **Նախագծի** արդյունք ներկայացված գիտական հրապարակումներում հեղինակի աշխատավայր (affiliation) պետք է նշվի **Կազմակերպությունը**:

8.5. **Նախագծի** շրջանակներում իրականացված հետազոտության արդյունքները հրապարակելիս անհրաժեշտ է նշել **Կոմիտեի** կողմից ստացած աջակցության մասին.

- *This work was supported by the Science Committee of RA (Research project № ____).*

Համապատասխան նշման բացակայության դեպքում հրապարակումը չի համարվելու Նախագծի արդյունք, հետևաբար՝ չի ընդունվելու հաշվետվության մեջ:

- 8.6. **Նախագծի** կատարման արդյունքում Հավելված 2.1-ով ներկայացված գիտական և գիտատեխնիկական գործունեության «1-5» բնագավառների մասնագիտություններով ակնկալվում է 25000.0 հազար ՀՀ դրամը, իսկ Հավելված 2.1-ով ներկայացված գիտական և գիտատեխնիկական գործունեության «6» բնագավառի մասնագիտություններով 15000.0 հազար ՀՀ դրամը գերազանցող միջազգային գիտական դրամաշնորհի առնվազն մեկ դիմում (submitted grant):
- 8.7. **Նախագծի** իրականացման ընթացքում **Խմբի** անդամները պետք է ապահովեն **Նախագծի** և/կամ գիտության տվյալ բնագավառի վերաբերյալ գիտահանրամատչելի նյութերի ստեղծում և հանրայնացում (հարցազրույցներ, հրապարակումներ գիտահանրամատչելի ամսագրերում, տեսանյութերի ստեղծում և տարածում, լայն լսարանի համար քննարկումների կազմակերպում և այլն), որոնք հաշվի կառնվեն **Խորհրդի** կողմից ամփոփիչ հաշվետվությունն ընդունելու մասին եզրակացություն տալիս:
- 8.8. «8.2.» ենթակետում նշված պայմանը չկատարելը/կատարելը կանդրադառնա հետագայում **Կոմիտեի** հայտարարած մրցույթներին **Խմբի** անդամների կողմից ներկայացվող հայտի փորձագիտական գնահատականի վրա՝ դրանից հանելով/գումարելով տվյալ մրցույթում հայտի առավելագույն գնահատականի 5 տոկոսի չափով միավոր՝ **Խմբի ղեկավարի** ընդգրկված լինելու դեպքում և 1 տոկոսի չափով միավոր՝ **Նախագծի** կատարողներից յուրաքանչյուրի դեպքում: Հանրագումարում կհանվի/կգումարվի տվյալ մրցույթում հայտի առավելագույն գնահատականի ոչ ավելի, քան 5 տոկոսի չափով միավոր: Հետագա մրցույթներին **Խմբի** անդամների կողմից ներկայացված հայտի փորձագիտական գնահատականի նվազեցումը կչեղարկվի **Նախագծի** ավարտից հետո **Կոմիտե** ներկայացվող ամփոփիչ հաշվետվությունն ընդունելու **Խորհուրդ** եզրակացության հիման վրա:

II. ՀԱՅՏԻ ԼՐԱՑՄԱՆ ԵՎ ՆԵՐԿԱՅԱՑՄԱՆ ԿԱՐԳԸ

9. Հայտ ներկայացնելը

- 9.1. **Հայտը** լրացնում և ներկայացնում է **Խմբի** ղեկավարը՝ rl-armenia-2023.scs.am/ առցանց համակարգի միջոցով: **Հայտի** ուղարկման վերջնաժամկետն է 2023 թվականի ապրիլի

07-ը (**Հայտի** ուղարկման հնարավորությունն արգելափակվում է ապրիլի 07-ին՝ Երևանի ժամանակով ժամը 18:00-ին):

9.2. Թղթային տարբերակով **Կոմիտե** են ներկայացվում հետևյալ փաստաթղթերը՝

☐ **Խմբի** ղեկավարի դիմումը (Հավելված N 2.2),

☐ **Նախահաշիվը**,

☐ **Կազմակերպության** (բուհի ֆակուլտետի) գիտական խորհրդի եզրակացությունը (Board Conclusion), որտեղ նշվում է **Նախագծի** համապատասխանությունը, կարևորությունը և արդիականությունը **Կազմակերպության** գիտական ուղղություններին,

☐ Նոր գիտական ստորաբաժանում կազմավորելու վերաբերյալ **Կազմակերպության** ղեկավարի գրությունը,

☐ կատարողների վերջին դիպլոմների պատճենները, իսկ ասպիրանտ կամ ուսանող հանդիսանալու դեպքում՝ համապատասխան տեղեկանք(ներ)ը,

☐ **Խմբի ղեկավարի և** անդամների մասնագիտական ինքնակենսագրությունները (CV):

9.3. Անհրաժեշտության դեպքում կարող են պահանջվել այլ փաստաթղթեր:

9.4. **Կազմակերպության** լիազորված անձը (գիտական քարտուղար կամ այլ) մինչև 2023 թվականի ապրիլի 14-ը ներառյալ մեկ ընդհանուր փաթեթով, առձեռն **Կոմիտե** է ներկայացնում **Կազմակերպության** կողմից ներկայացված բոլոր **Հայտերին** վերաբերող փաստաթղթերը, աշխատանքային օրերին՝ ժամը 09:00-13:00 և 14:00-18:00 (Օրբելի եղբայրների 22, 7-րդ հարկ, 706 սենյակ):

9.5. **Մրցույթի** վերաբերյալ լրացուցիչ տեղեկատվություն և խորհրդատվություն կարելի է ստանալ **Կոմիտեի** գիտական գործունեության կազմակերպման վարչությունից, հեռախոս՝ (010) 210140 (ներքին 108), էլեկտրոնային փոստ՝ scexpert@scs.am:

Ուշադրություն. Կոմիտեն քննարկման է ընդունում միայն առցանց համակարգի կողմից ձևավորված Հայտերը: Հայտերը, որոնք չեն ուղարկվել վերը նշված կարգի և ժամկետների համաձայն, քննարկման ենթակա չեն:

10. Նախահաշիվը Նախահաշիվը կազմված է «Աշխատանքի վարձատրություն» և «Այլ ծախսեր» հոդվածներից: «Այլ ծախսեր» հոդվածը բաղկացած է «Սարքեր, նյութեր և ծառայություններ», «Գործուղումներ», «Խմբի կամ լաբորատորիայի ստեղծում», «Փորձարարական հետազոտություններ» և «Վերադիր ծախսեր» ենթահոդվածներից:

- 10.2. **Նախահաշվի** «Աշխատանքի վարձատրություն» հոդվածում **Խմբի անդամների** (բացառությամբ **Խմբի ղեկավարի**) աշխատանքի ամսական վարձատրության միջին չափն ընդունել 300.0 հազար դրամ (ներառյալ հարկերը և այլ պարտադիր վճարները):
- 10.3. Եթե աշխատանքի վարձատրության համար նախատեսված գումարը պակաս է վերոնշյալ ծավալից, ապա տարբերությունը կարելի է օգտագործել **Նախահաշվի** «Այլ ծախսեր» հոդվածում:
- 10.4. «Այլ ծախսեր» հոդվածի «Սարքեր, նյութեր և ծառայություններ», «Գործուղումներ» և «Վերադիր ծախսեր» ենթահոդվածներով գումարային 12-ամսվա կտրվածքով կարելի է նախատեսել մինչև 1000.0 հազար դրամ՝ **Խմբի յուրաքանչյուր** անդամի հաշվարկով (բացառությամբ **Խմբի ղեկավարի**): Այս գումարը կարող է ավելանալ «10.3.» կետով սահմանված տարբերության չափով:
- 10.5. Հայաստանի Հանրապետությունում գտնվելու ժամանակահատվածի ընթացքում **Խմբի ղեկավարի**(ների) համար կարող է նախատեսվել հոնորար՝ շաբաթական մինչև 150.0 հազար դրամ, բայց ոչ ավելի, քան հանրագումարային 3000.0 հազար դրամ **Նախագծի** կատարման ողջ ընթացքի համար:
- 10.6. **Նախահաշվի** «Այլ ծախսեր» հոդվածի «Սարքեր, նյութեր և ծառայություններ» ենթահոդվածով կարող են նախատեսվել գիտական սարքավորումների, հետազոտությունների ընթացքում օգտագործվող նյութերի ձեռքբերման և/կամ ծառայությունների ծախսերը: Համադրելով ծառայությունների մատուցման պայմանագրեր կարող է կնքել միայն իրավաբանական անձանց հետ՝ համաձայնեցնելով **Կոմիտեի** հետ:
- 10.7. **Նախահաշվի** «Այլ ծախսեր» հոդվածի «Գործուղումներ» ենթահոդվածով նախատեսվող գումարը կարող է օգտագործվել **Նախագծի** ընթացքի ու արդյունքների ներկայացման նպատակով միջազգային գիտաժողովներին մասնակցության համար, ինչպես նաև **Խմբի ղեկավարի** և անդամների փոխադարձ այցելությունների գործուղման ծախսերը հոգալու համար:
- 10.8. **Նախահաշվի** «Այլ ծախսեր» հոդվածի «Խմբի կամ լաբորատորիայի ստեղծում» ենթահոդվածով առաջին 12-ամսվա համար լրացուցիչ կարող է հայցվել 15000.0 հազար դրամ, որը կարող է օգտագործվել **Խմբի** կամ **լաբորատորիայի** ենթակառուցվածքի բարելավման ուղղությամբ և **Նախագծի** կատարման համար անհրաժեշտ այլ ծախսերի համար:

- 10.9. **Նախահաշվի** «Այլ ծախսեր» հոդվածի «Փորձարարական հետազոտություններ» ենթահոդվածով լրացուցիչ 20000.0 հազար դրամ կարող է հայցվել փորձարարական հետազոտություններ նախատեսող **Նախագծերի** համար, որը կարող է նախատեսվել գիտական սարքավորումների և նյութերի ձեռքբերման և **Նախագծի** բնույթով պայմանավորված այլ ծախսերի համար:
- 10.10. Գիտական սարքերի և սարքավորումների ձեռքբերումը չի կարող նախատեսվել **Նախագծի** իրականացման վերջին տարում:
- 10.11. **Նախահաշվի** «Այլ ծախսեր» հոդվածի «Վերադիր ծախսեր» ենթահոդվածով (60 ամսվա համար) կարող է հայցվել մինչև 2500.0 հազար դրամ:
- 10.12. Գործուղումների օրապահիկը և գիշերավարձը հաշվարկելիս անհրաժեշտ է առաջնորդվել Հայաստանի Հանրապետության կառավարության 2005 թվականի դեկտեմբերի 29-ի N 2335-Ն որոշմամբ:
- 10.13. **Նախահաշվի** բոլոր ենթահոդվածների ծախսերը պետք է հիմնավորել **Նախահաշվի** մեկնաբանության մեջ:
- 10.14. **Նախահաշվի** հիմնավորվածությունը և բաշխումը կարող են լրամշակվել **Խորհրդի** առաջարկությամբ և **Խմբի ղեկավարի** համաձայնությամբ:

III. ՀԱՅՏԵՐԻ ԳՆԱՀԱՏՈՒՄԸ

11. Հայտերի համապատասխանությունը Մրցույթի պայմաններին

- 11.1. **Կոմիտեն** ուսումնասիրում է **Մրցույթին** ներկայացված **Հայտերի** համապատասխանությունը **Մրցույթի** պայմաններին:
- 11.2. Բեալի ցանկերում (Beall's list, <https://beallslist.net/>) ներառված կեղծ կամ «գիշատիչ» հրատարակչություններում կամ պարբերականներում հրատարակված աշխատությունների ներկայացվածությունը **Հայտում**,
- 11.3. Ստուգման արդյունքները տրամադրում է **Հայտերի** գնահատման համար ստեղծված **Խորհրդին**:
- 11.4. **Խորհրդի** կողմից քննարկվում է **Հայտը** փորձաքննության ենթարկելու հարցը:
- 11.5. **Խորհուրդը** հաստատում է փորձաքննության ենթակա **Հայտերի** ցանկը:

12. Փորձաքննությունը

- 12.1. **Խորհուրդը Կոմիտեի** հետ համատեղ մշակում և հաստատում է **Հայտերի** փորձաքննության առաջին և երկրորդ փուլերի (գիտական փորձաքննության և հարցազրույցի) գնահատման թերթիկները և վարման կարգը:

13. Փորձաքննության առաջին փուլը

- 13.1. Փորձաքննության առաջին փուլում **Խորհուրդը**, հաշվի առնելով **Նախագծի** ընդարձակ ամփոփագիրը (Հավելված 2.3), **Խմբի ղեկավարի** և համաղեկավարի գիտական հետազիծը (track record), մասնագիտական ինքնակենսագրությունը (CV), **Կազմակերպության** համապատասխանությունը **Նախագծի** նպատակներին, համաձայնության սկզբունքով ձևավորում է առաջին փուլը հաղթահարած և փորձաքննության հաջորդ փուլ անցած **Հայտերի** ցանկը:
- 13.2. Փորձաքննության առաջին փուլը չհաղթահարած **Հայտերի Խմբի** ղեկավարները տեղեկացվում են այդ մասին:

14. Փորձաքննության երկրորդ փուլը

- 14.1. Փորձաքննության առաջին փուլը հաղթահարած **Հայտերը** ենթարկվում են գիտական փորձաքննության, իսկ **Խմբի** ղեկավարների և համաղեկավարի հետ անցկացվում են հարցազրույցներ: Այս փուլում գնահատվում են խնդրի արդի վիճակը, նորույթը, հեռանկարը, **Կազմակերպությունում** իրականացման նախադրյալները, համապատասխանությունը ոլորտի զարգացման միտումներին, աշխատանքի ծավալի և իրականացման ժամկետների հիմնավորվածությունը, համագործակցության նպատակահարմարությունը, **Խմբի ղեկավարի**, համաղեկավարի, կատարողների որակավորումը և մասնագիտական համապատասխանությունը **Նախագծի** նպատակներին, գիտական արդյունքների տնօրինումը և տարածումը, **Նախահաշվի** հիմնավորվածությունը, ինչպես նաև **Մրցույթի** առանձնահատկություններից բխող այլ հարցեր:
- 14.2. **Հայտը** գիտական փորձաքննության է ենթարկվում առնվազն երկու փորձագետի կողմից: Որպես փորձագետ կարող է հանդես գալ նաև **Խորհրդի** անդամը:
- 14.3. Յուրաքանչյուր **Հայտի** համար փորձագետը լրացնում է գիտական փորձաքննության գնահատման թերթիկը:

- 14.4. Երկու փորձագետների գնահատականները գիտական փորձաքննության առավելագույն գնահատականի 30 և ավելի տոկոսով տարբերվելու դեպքում **Հայտը** ենթարկվում է փորձաքննության երրորդ փորձագետի կողմից: Այդ դեպքում գիտական փորձաքննության գնահատականը երեք փորձագետների՝ երկու իրար մոտ գնահատականների միջին թվաբանականն է: Երեք փորձագետների գնահատականների հավասար տարբերությունների դեպքում գիտական փորձաքննության գնահատականը երկու առավելագույն գնահատականների միջին թվաբանականն է:
- 14.5. Գիտական փորձաքննության ժամանակ փորձագետի առավելագույն գնահատականը կազմում է **Հայտի** առավելագույն գնահատականի 50 տոկոսը:
- 14.6. Հարցազրույցի ժամանակ **Խորհրդի** յուրաքանչյուր անդամ լրացնում է հարցազրույցի գնահատման թերթիկը:
- 14.7. Հարցազրույցի առավելագույն գնահատականը կազմում է **Հայտի** առավելագույն գնահատականի 50 տոկոսը:
- 14.8. Փորձաքննության երկրորդ փուլի գնահատականը երկու փորձագետների գնահատականների միջին թվաբանականի և հարցազրույցի գնահատականների միջին թվաբանականի գումարն է:
- 14.9. **Կոմիտեի** և փորձագետների կողմից Հայտի բովանդակության, գիտական փորձաքննության ընթացքի և արդյունքի վերաբերյալ տեղեկությունների տրամադրումն այլ անձանց արգելվում է՝ համաձայն «Գիտական և գիտատեխնիկական փորձաքննության մասին» Հայաստանի Հանրապետության օրենքով սահմանված դրույթների:

15. Գնահատման արդյունքները

- 15.1. **Կոմիտեն** փորձաքննության երկրորդ փուլի արդյունքներով ձևավորում է **Հայտերի** վարկանիշային ցանկ՝ գնահատականների նվազման կարգով և ներկայացնում **Խորհրդին**՝ քննարկման:
- 15.2. Խորհուրդը **Կոմիտեի** նախագահին է ներկայացնում Հայտերի գնահատականների վարկանիշային ցանկը:
- 15.3. **Կոմիտեն**, ելնելով Հայաստանի Հանրապետության պետական բյուջեից գիտական և գիտատեխնիկական գործունեության պայմանագրային (թեմատիկ) ֆինանսավորման հատկացումների չափից, որոշում է գիտական և գիտատեխնիկական գործունեության

յուրաքանչյուր բնագավառի շեմային գնահատականը և Հանրապետության կրթության, գիտության, մշակույթի և սպորտի նախարարին է ներկայացնում ֆինանսավորման երաշխավորված **Հայտերի** ցանկը և նախատեսված ֆինանսավորման չափը հաստատելու մասին հրամանի նախագիծը:

- 15.4. **Մրցույթի** արդյունքում ֆինանսավորման երաշխավորված **Հայտերի** ցանկը տեղադրվում է **Կոմիտեի** պաշտոնական կայքում:
- 15.5. **Կոմիտեն Կազմակերպության** ղեկավարին տրամադրում է տվյալ **Կազմակերպության** հաղթող **Հայտերի** ցանկը և յուրաքանչյուր **Հայտի Նախահաշիվը**:
- 15.6. **Կոմիտեն Խմբի ղեկավարին** տրամադրում է փորձաքննության արդյունքները և անցողիկ շեմային գնահատականը:

IV. ԱՅԼ ԴՐՈՒՅԹՆԵՐ

16. Հայտի տեխնիկական քննությունը

- 16.1. **Հայտը** չի դիտարկվում հետևյալ դեպքերում՝
- չի պարունակում բոլոր անհրաժեշտ փաստաթղթերը,
 - չի բավարարում **Մրցույթի** հրավերի պայմաններին,
 - բովանդակությամբ համընկնում է Հայաստանի Հանրապետության պետական բյուջեից ֆինանսավորվող կամ ֆինանսավորված որևէ գիտական նախագծի հետ,
 - միաժամանակ ներկայացված է **Կոմիտեի** կողմից անցկացվող այլ մրցույթներին:

17. Այլ պայմաններ

- 17.1. Մտավոր սեփականության հեղինակային կամ արտոնագրային իրավունքի օբյեկտ հանդիսացող նյութեր պարունակող **Նախագիծը** և այնուհետև հաշվետվությունը ներկայացնելու դեպքում **Խմբի ղեկավարը** պետք է առաջնորդվի «Հեղինակային իրավունքի և հարակից իրավունքների մասին» և «Գյուտերի, օգտակար մոդելների և արդյունաբերական նմուշների մասին» Հայաստանի Հանրապետության օրենքներով սահմանված դրույթներով:
- 17.2. **Նախագծի** իրականացման ընթացքում, յուրաքանչյուր 12 ամիսը լրանալուց հետո՝ տասնօրյա ժամկետում, **Կոմիտե** է ներկայացվում ընթացիկ հաշվետվություն, որի

հիման վրա **Խորհուրդը** տալիս է **Նախագծի** ֆինանսավորումը շարունակելու նպատակահարմարության մասին եզրակացություն:

- 17.3. **Նախագծի** իրականացման 35 ամիսը լրանալուց հետո՝ տասնօրյա ժամկետում, **Կոմիտե** է ներկայացվում եռամյա հաշվետվություն, ներառելով **Նախագծի** ակնկալվող միջանկյալ արդյունքները, որոնց հիման վրա **Խորհուրդը** տալիս է **Նախագծի** ֆինանսավորումը դադարեցնելու կամ ևս 24 ամիս շարունակելու նպատակահարմարության մասին եզրակացություն:
- 17.4. **Նախագծի** կատարման ընթացքում **Կոմիտեն** կարող է իրականացնել **Նախագծի** մշտադիտարկում և արդյունքները ներկայացնել **Խորհրդին**:
- 17.5. **Նախագծի** ֆինանսավորումը շարունակելու նպատակահարմարության մասին եզրակացություն տալիս **Խորհուրդը** պետք է հաշվի առնի նաև մշտադիտարկման արդյունքները:
- 17.6. **Նախագծի** հետագա ֆինանսավորումը դադարեցվում է ընթացիկ հաշվետվությունը սահմանված ժամկետում չներկայացնելու դեպքում:
- 17.7. **Նախագծի** իրականացման 60-րդ ամիսը լրանալուց հետո՝ տասնօրյա ժամկետում, **Կոմիտե** է ներկայացվում ամփոփիչ հաշվետվություն, որի հիման վրա **Խորհուրդը** տալիս է հաշվետվությունն ընդունելու մասին եզրակացություն:
- 17.8. **Կոմիտեն** կարող է ֆինանսավորման երաշխավորված **Նախագծերի** անոտացիան և հաշվետվությունը հրապարակել տպագիր կամ էլեկտրոնային եղանակով:
- 17.9. **Կոմիտեի, Կազմակերպության** և ֆինանսավորման երաշխավորված **Հայտի Խմբի** համադրեկավարի միջև կնքվում է **Պայմանագիր**՝ «17.10.» կետում նշված պայմանագրերի առկայության դեպքում:
- 17.10. Ֆինանսավորման երաշխավորված **Նախագծի Խմբի** կատարողների դրամաշնորհի շրջանակներում կնքված պայմանագրերի պատճենները ներկայացվում են **Կոմիտե**:
- 17.11. **Նախագծի** իրականացման ընթացքում (ոչ շուտ քան 12 ամիս անց) **համադրեկավարը** կարող է դիմել **Կոմիտե**՝ **Նախագծի** կատարողների թիվը **Նախագծին** առնչվող մասնագիտություն ունեցող առավելագույնը 2 մինչև 35 տարեկան կատարողներով ավելացնելու առաջարկով՝ ներկայացնելով համապատասխան հիմնավորում:
- 17.12. «17.11.» կետով ներգրավված կատարողները չպետք է լինեն Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող որևէ կազմակերպության աշխատակից:

- 17.13. Կատարողների թիվն ավելանալու պարագայում **համադեկավարի, Կազմակերպության և Կոմիտեի** միջև կնքված **Պայմանագրի** գինն ավելանում է յուրաքանչյուր նոր կատարողի համար մինչև 1 800.0 հազար դրամով (12 ամսվա կտրվածքով):
- 17.14. **Նախագծի** իրականացման ընթացքում **Խմբի** ղեկավարը կարող է տեղափոխվել Հայաստանի Հանրապետություն (ոչ պակաս քան 12 ամիս տևողությամբ): Այդ նպատակով համադեկավարը դիմում է **Կոմիտե՝ Նախագծի** անդամների թիվը ևս մեկով ավելացնելու առաջարկով՝ ներկայացնելով համապատասխան հիմնավորում:
- 17.15. Կատարողների թիվը **Խմբի ղեկավարով** ավելանալու պարագայում **համադեկավարի, Կազմակերպության և Կոմիտեի** միջև կնքված **Պայմանագրի** գինն ավելանում է ամսեկան 600.0 հազար դրամով, իսկ ընտանիքի անդամ(ներ)ի հետ Հայաստանի Հանրապետություն տեղափոխվելու դեպքում՝ ամսեկան ևս 150.0 հազար դրամի չափով:
- 17.16. **Կազմակերպությունը, Խմբի ղեկավարի** տեղափոխվելու պարագայում, նրան ներառում է գիտական և գիտատեխնիկական գործունեության բազային ֆինանսավորմամբ ծրագրում: Եթե **Խմբի ղեկավարը** ծնվել է 1973 թվականի հունվարի 1-ից հետո, ապա նա կարող է զբաղեցնել 6-10 կետով ձևավորված գիտական ստորաբաժանման ղեկավարի պաշտոնը:
- 17.17. 17-14-17-16 կետերը կարող են կիրառվել նաև «Հեռավար լաբորատորիաների հիմնադրման ծրագիր 2022» մրցույթի հաղթողների համար:
- 17.18. Համադեկավարը կարող է դիմել **Կոմիտե՝** կատարողի համարժեք փոփոխություն կատարելու՝ ըստ տարիքային խմբի և գիտական գործունեության արդյունավետության ցուցանիշի, կամ **Խմբի** անդամների թիվը մեկով կրճատելու միջնորդությամբ՝ ներկայացնելով համապատասխան հիմնավորում: **Խմբում** կատարողի փոփոխություն կատարելու դեպքում համադեկավարը **Կոմիտե** է ներկայացնում նոր կատարողի հետ դրամաշնորհի շրջանակներում կնքված պայմանագրի պատճենը, իսկ խմբի անդամների թվի կրճատման դեպքում կնքվում է **Պայմանագրի** գնի փոփոխության մասին համաձայնագիր:

ԳԻՏԱԿԱՆ ԵՎ ԳԻՏԱՏԵԽՆԻԿԱԿԱՆ ԳՈՐԾՈՒՆԵՈՒԹՅԱՆ ԲՆԱԳԱՎԱՌՆԵՐԸ ԵՎ ՄԱՍՆԱԳԻՏՈՒԹՅՈՒՆՆԵՐԸ՝ ՀԱՄԱՊԱՏԱՍԽԱՆ ԴԱՍԻՉՆԵՐՈՎ

1. ԲՆԱԿԱՆ ԳԻՏՈՒԹՅՈՒՆՆԵՐ 1.1 Մաթեմատիկա 1.2 Ինֆորմատիկա և համակարգչային գիտություններ 1.3 Ֆիզիկա և աստղագիտություն 1.4 Քիմիա 1.5 Երկրի մասին և դրան հարակից բնապահպանական գիտություններ 1.6 Կենսաբանական գիտություններ 2. ՃԱՐՏԱՐԱԳԻՏՈՒԹՅՈՒՆ ԵՎ ՏԵԽՆՈԼՈԳԻԱ 2.1 Քաղաքաշինություն և ճարտարապետություն 2.2 Էլեկտրատեխնիկա, էլեկտրոնիկա, էներգետիկա, համակարգչային և տեղեկատվական տեխնոլոգիաներ 2.3. Մեխանիկա 2.4 Մեքենագիտություն և մեքենաշինություն 2.5 Քիմիական տեխնոլոգիաներ 2.6 Նյութագիտություն 2.7 Բժշկական սարքաշինություն 2.8 Էկոլոգիա 2.9 Կենսատեխնոլոգիա 2.10 Նանոտեխնոլոգիա 3. ԲԺՇԿԱԿԱՆ ԳԻՏՈՒԹՅՈՒՆՆԵՐ 3.1. Ընդհանուր բժշկություն 3.2. Կլինիկական բժշկություն 3.3. Բժշկական կենսատեխնոլոգիա	4. ԳՅՈՒՂԱՏՆՏԵՍԱԿԱՆ ԳԻՏՈՒԹՅՈՒՆՆԵՐ 4.1 Անասնաբուծություն, անասնաբուժություն 4.2 Բուսաբուծություն 4.3 Հողագիտություն, ագրոքիմիա, բույսերի պաշտպանություն 4.4 Գյուղատնտեսական կենսատեխնոլոգիա 5. ՀԱՍԱՐԱԿԱԿԱՆ ԳԻՏՈՒԹՅՈՒՆՆԵՐ 5.1 Հոգեբանություն 5.2 Տնտեսագիտություն և գործարարություն 5.3 Մանկավարժական գիտություններ 5.4 Սոցիոլոգիա 5.5 Իրավունք 5.6 Քաղաքական գիտություններ 5.7 Սոցիալական և տնտեսական աշխարհագրություն 5.8 Զանգվածային լրատվություն և հաղորդակցություն 6. ՀԱՅԱԳԻՏՈՒԹՅՈՒՆ ԵՎ ՀՈՒՄԱՆԻՏԱՐ ԳԻՏՈՒԹՅՈՒՆՆԵՐ 6.1 Պատմություն, հնագիտություն 6.2 Լեզվագիտություն, գրականագիտություն 6.3 Փիլիսոփայություն, էթիկա 6.4 Աստվածաբանություն, կրոնագիտություն 6.5 Արվեստագիտություն
---	--

ՀՀ ԿԳՄՄՆ ԳԻՏՈՒԹՅԱՆ ԿՈՄԻՏԵԻ
ՆԱԽԱԳԱՀ ՊԱՐՈՆ ՍԱՐԳԻՍ ՀԱՅՈՑՅԱՆԻՆ

ՔԱՂԱՔԱՑԻ _____
(անուն հայրանուն)
_____ից
(ազգանուն)

(հասցե)

(հեռախոս)

ԴԻՄՈՒՄ

Խնդրում եմ ընդունել Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում «Հեռավար լաբորատորիաների հիմնադրման ծրագիր 2023» մրցույթին մասնակցության «_____» վերնագրով հայտը:

Դիմող՝ _____
(ստորագրություն)

(_____)
(անուն, ազգանուն)

« ____ » _____ 2023թ.

Նախագծի վերնագիրը

--

Ընդարձակ ամփոփագիրը

Ընդարձակ ամփոփագիրը գնահատվում է փորձաքննության առաջին փուլում, հարկավոր է ներկայացնել անգլերեն, մինչև 2 էջ:

Ընդարձակ ամփոփագիրը պետք է լինի **Նախագծի** հակիրճ տարբերակը և շեշտադրի հետազոտության կարևորությունն ու նպատակահարմարությունը:

--

Ն ա խ ա գ ի ծ

Ներկայացնել անգլերեն, մինչև 12 էջ՝ ներառյալ գրաֆիկները, գծագրերը, լուսանկարները և գրականության ցանկը.

1. Համառոտ բնութագիրը (անոտացիա)

2. Հետազոտական խնդրի վերաբերյալ գիտելիքների ներկա վիճակի մասին վերլուծությունը

3. Ծրագրի նպատակները և խնդիրները

4. Հետազոտական նախագիծը

5. Իրականացման միջոցներ: Մեթոդները

6. Օրացուցային պլանը (ըստ եռամսյակների կամ Գանտի աղյուսակ)

7. Խմբի ձեռքբերումները տվյալ ոլորտում, օտարերկրյա գործընկերոջ համապատասխանությունը և ակնկալվող արդյունքները

8. Խմբի զարգացման հեռանկարները (ռիսկերը և հնարավորությունները)

9. Ակնկալվող արդյունքների քանակական և որակական ցուցանիշներ (գիտական հոդվածներ, գիտաժողովների նյութեր և այլն), նորարարական կարողության օգտագործում (տեխնոլոգիական ներդրում, ցուցադրում, փորձնական նմուշ, նախատիպ և այլն), մտավոր սեփականության տնօրինում (արտոնագիր, հեղինակային իրավունք և այլն), միջազգային համագործակցային կապերի ամրապնդում, համագործակցության հեռանկարներ)

10. Օգտագործված գրականության ցանկ